

Da poi disnar, fo Colegio di Savii *ad consulendum*.

A dì 4. La matina, non fo letera alcuna da conto.

Da poi disnar, fo Pregadi per far uno savio dil Consejo et uno di Terra ferma, et meter la parte di far Baylo a Constantinopoli. Fo leto tre lettere dil Provedador di l'armada, di Franza et Milan; ma la letera di eri, da Milan, non fo leta.

Fu posto, per i Consieri e Cai di XL, una confirmation di uno salvoconduto per anni 10 fato per sier Lunardo Bembo baylo nostro a Constantinopoli, a dì 2 Marzo 1517, a uno Manoli Psino da la Cania, qual era bandito di la Cania per homicidio, et ha tolto la fia dil morto per moglie, con questo servi 6 mexi la Signoria nostra a sue spexe, dove l'achaderà; et cussi fu posto per anni 10 et più a beneplacito di la Signoria nostra. Et balotà do volte, fu preso. Ave 180, 17, 7; poi 129, 24, 16.

Fu posto, poi leta una suplication di sier Zuan Michiel qu. sier Donado, nara li danni patiti in questa guerra, fato preson di spagnoli, stete in Castel Vechio di Verona mexi 4, li fo dato taia ducati 500, soa moier presa a Piove, tolloli ducati 600 etc., *ut in ea*; unde li Consieri, Cai di XL et Savii messeno suspender li soi debiti per anni 2, et non fu presa. Ave 70 di no, 130 de si; non ave il numero. A uno altro Consejo.

Fu fato scurtinio di un savio dil Consejo, che manca, per mexi 3. Tolti 9, rimase sier Piero Capelo. Il scurtinio sarà posto qui soto. Il qual introe *immediate*.

Fato scurtinio di un savio di Terra ferma, tolli numero . . . et niun passoe; il scurtinio *etiam* sarà qui avanti: eramo 202.

181* Fu posto poi per i Savii tutti, havendo compito el Baylo nostro di Constantinopoli il tempo che per li capitoli dia star, sia electo il primo Gran Consejo, per scurtinio et quatro man di eletion, uno Baylo a Constantinopoli, con salario, per spexe, ducati 120 al mexe, a soldi 124 per ducato, et si pagi di baylazi etc., et habi il resto, zoè ducati 80 al mexe, da la camera di Candia, et siali ubligà il dazio dil vin di Candia di l'usida di 4 mexi in 4 mexi, et questa sia la prima partida, con altre clausule di danari etc.; meni 4 cavali et 4 servidori, et uno nodaro de la Canzelaria nostra justa la parte dil Consejo di X. Il qual, oltre il solito salario, habi ducati 40 a l'anno quando el va, el resto in Candia, et al predito, *etiam* li sia ubligà il prefato dazio dil vin di Candia. *Item*, siali dà al Baylo de qui ducati 600 di soven-

zion, et al secretario ducati 40, come ho dito di sopra; sia tenuto risponder in termene de zorni 3, e acetando non possi refudar soto pena di ducati 500, et parti fra uno mexe con quella commission li sarà dà per questo Consejo. Ave 12 di no, 164 di si, et fu presa.

Fu posto, per i Savii ai ordini, *cum sit* a dì 3 Lujo 1518 fusse concesso a Leonardo Petretin armar la galia di Corfù in loco di domino Baptista Petretin, per il resto hanno justà la concession fatoli per il zeneral Pexaro, et atento dito Leonardo è morto, che a uno Giacomo suo fradelo siali concessa la dita gratia di poter armar da poi li soracomiti electi per la comunità, *ut in parte*. Ave 116 de si, 42 di no, 2 non sincere, e fu presa.

Fu leto una suplication di uno Marco Maraschin, qual voria far di certe erbe cenere su l'isola di Candia, da far veri e saoni, et non vol tuor erbe di altri, nè contra il voler di patroni, con questo per 20 anni altri non possi far, et per anni 10 non vol pagar decima, ma ben poi i anni 10, oferendosi *etiam* insegnar a farne in le altre ixole nostre dita cenere, qual sia per conto di la Signoria. Et cussi, per li Consieri e Cai di XL, fu posto concederli quanto el dimanda; fu presa: 152, 19, 1.

In questo Pregadi vene sier Francesco Donado el cavalier, Cao di X, stato a la villa, e introe Cao.

È da saper, in questi zorni, per il Colegio, fo terminà dispensar a la camera di l'Armamento a' creditori stati in armada, moier e fioli etc. stera 500 formento a ster $\frac{1}{2}$ per uno, che si soleva dar stera do. *Etiam* danari, ma i tempi è streti. Fo electi do Savii ussiti di Colegio, sier Nicolò Bernardo e sier Piero Contarini, et uno di Ordeni, ch'è sier Zuan Baptista da Pexaro.

Scurtinio di un Savio dil Consejo.

Sier Andrea Foscarini, fo Cao dil Consejo di X, qu. sier Bernardo. . .	41.162
Sier Zuan Venier, fo Cao dil Consejo di X, qu. sier Francesco, qu. sier Alvixe	63.126
Sier Daniel Renier, fo capitano a Verona, qu. sier Constantin	77.123
Sier Gasparo Malipiero, fo savio a Terra ferma, qu. sier Michiel. . . .	51.149
Sier Francesco Donado el cavalier, Cao dil Consejo di X, qu. sier Alvise . .	53.146
Sier Marin Sanudo, fo savio a Terra ferma, qu. sier Francesco. . . .	52.151